


Urnaí na Nóna

Leabhar na hUrnaí Coitinne (2004), Eaglais na hÉireann



15 Mheán Fómhair 2021

Seachtain an Chúigiú Dhomhnach Déag

i ndiaidh na Tríonóide

Séiplíneacht Eaglais na hÉireann

Coláiste na Tríonóide, Baile Átha Cliath

Deirtear **ABAIRT(Í) ÓN SCRÍOPTÚR**

Deirtear **AN FHAOISTIN** *ag an bpobal:*

A bhráithre na páirte, is iomaí áit sa Scriptoráil a mholas dúinn admháil agus aithreachas a dhéanamh faoi mhéid ár bpeacaí agus ár n-urchóide; agus gan iad a cheilt ná a chlúdach i bhfianaise Dé uilechumhachtaigh, ár nÁthair neamhaí; ach iad a admháil le croí umhal, íseal, aithríoch, ómósach; i gcaoi go bhfaighimid maithiúnas iontu trína mhaitheas agus trína thrócaire dhochuimsithe. Agus cé gur chóir dúinn i gcónaí ár bpeacaí a admháil go humhal i láthair Dé, is é an t-am is córa chuige am ár gcruinnithe agus ár gcomhthionóil, am altaithe na sochar a bhronn sé orainn, am seinnte a mhórmholta mar is dual, am éisteachta a Bhriathair fhíornaofa, am iarrtha na nithe is gá agus is riachtanach dúinn, idir chorp agus anam. Dá bhrí sin, iarraim d'achainí oraibh, an méid atá anseo i láthair, teacht liom le glaine croí agus le humhlaíocht glóir, go dtí ríchathaoir na ngrást neamhaí, agus a rá i mo dhiaidh:

Téann a bhfuil i láthair ar a nglúin

A Athair uilechumhachtaigh, shárthrócairigh, chuamar ar seachrán, agus d'imíomar ó do dhlíthese ar nós caorach fáin. Leanamar an iomarca de mheanga agus de mhianta ár gcroí féin. Chiontaíomar in aghaidh do dhlíthe naofasa. D'fhágamar gan déanamh na nithe ba chóir dúinn a dhéanamh, agus rinneamar na nithe nár chóir dúinn a dhéanamh; Agus níl folláine ar bith ionainn. Ach, a Thiarna, bíodh trócaire agat orainn, na peacaigh thrua. Coigilse, a

Dhia, na daoine admhaíos a gcionta. Glac chugat arís lucht an aithreachais; De réir do ghealltanais a foilsíodh don chine daonna in Íosa Críost, ár dTiarna. Agus deonaigh, a Athair shárthrocairigh, ar a shon-sean; Go gcaithfidimid ár saol feasta go diaga deabhóideach, go firéanta foistineach, chun glóire d’Ainm naofa féin. Amen.

Fograítear an t-Aspalóid má thá Sagart nó Easpag i láthair

Paidir an Tiarna

Ár n-Athair, atá ar neamh, go naofar d’ainm, go dtaga do ríocht, go ndéantar do thoil ar talamh, mar a dhéantar ar neamh. Ár n-arán laethúil tabhair dúinn inniu. Agus maith dúinn ár bhfiacha, mar a mhaithimidne dár bhféichiúna féin. Agus ná lig sinn i gcathú, ach saor sinn ón olc. Óir is leatsa an ríocht, agus an chumhacht, agus an ghlóir, trí shaol na saol. Amen.

Stiúrann an feidhmeannach na **VEIRSICLÍ & FREAGRAÍ:**

A Thiarna, oscailse ár mbeola
Agus foilseoidh ár mbéal do mholadhais

A Dhia, déan deifir chun ár saortha
A Thiarna, déan dithneas chun cabhrú linn

Glóir don Athair, agus don Mhac, agus don Spiorad Naomh;
Mar a bhí ar dtús, mar atá anois, agus mar a bheas go brách, trí shaol na saol. Amen.

*Deirtear **SALM 73:21-28** i leath-línte fá seach:*

21 Toisc go raibh m'aighe a spreagadh chun feirge :

le linn do mo chroí bheith á chiapadh,

22 bhí mé amaideach, baoth, neamhthuisceanach;

ba chuma nó beithíoch mé i d'fhianaise.

23 Mar sin féin bím i d'fhochair de shíor :

agus beireann tú ar dheasláimh orm.

24 Déanfaidh tú mo threorú le do chomhairle :

agus glacfaidh tú chun na glóire faoi dheoidh mé.

25 Cé atá agam ar neamh ach tú? :

Agus má bhím leatsa ní áil liom a bhfuil ar talamh.

26 Bíodh go gcliseann mo cholainn is mo chroí rinne carraig
mo chléibh de Dhia :

is é mo chuid é go síoraí suthain.

27 An drong a thréigeann thú, rachaidh siad ar ceal :

scriosann tú a n-imíonn uait le striapachas.

28 Is fearr liomsa bheith i ngar do Dhia agus mo dhóchas
a chur sa Tiarna, mo Dhia :

ionas go n-inseoinn d'éachtaí go léir i ndoirse iníon Shíón.

Glóir don Athair, agus don Mhac, agus don Spiorad Naomh
**Mar a bhí ar dtús, mar atá anois, agus mar a bheas go
brách, trí shaol na saol. Amen.**

*Suíonn a bhfuil i láthair, agus léifear **AN CHÉAD CHEACHT**
(Leabhar na Seanfhocal 29:1-27).*

*Seasann a bhfuil i láthair roimh an **MAGNIFICAT** a rá:*

- 1 Mórann m'anam an Tiarna :
agus rinne mo spiorad gairdeas i nDia mo shlánaitheoir.
- 2 Óir dhearc sé le fábhair ar ísle a bhanóglaigh :
mar féach, déarfaidh na glúine uile feasta gur méanar dom.
- 3 Óir rinne an Té atá cumhachtach nithe móra dom :
agus is naofa a ainm.
- 4 Agus tá a thrócaire ó ghlúin go glúin :
dóibh seo ar a mbíonn a eagla.
- 5 Thaispeáin sé neart a láimhe :
scaip sé an dream a bhí uaibhreach i smaointe a gcroí.
- 6 Leag sé prionsaí óna gcathaoireacha :
agus d'ardaigh sé na daoine ísle.
- 7 Líon sé lucht an ocrais le nithe maithe :
agus chuir sé na saibhre uaidh folamh.
- 8 D'fhóir sé ar Iosrael a sheirbhíseach :
ag cuimhneamh dó ar a thrócaire –
- 9 de réir mar a gheall sé dár sinsir :
d'Abrahám agus dá shliocht go brách.

Glóir don Athair, agus don Mhac, agus don Spiorad Naomh
**Mar a bhí ar dtús, mar atá anois, agus mar a bheas go
brách, trí shaol na saol. Amen.**

*Suíonn cách a bhfuil i láthair, agus léifear **AN DARA CHEACHT**
(Eoin 7:25-36).*

Seasann a bhfuil i láthair roimh **NUNC DIMITTIS** *a rá:*

- 1 Anois atá tú ag scaoileadh do sheirbhísigh uait, a Thiarna :
de réir d'fhocail, faoi shíocháin.
- 2 Mar tá mo shúile tar éis do shlánú a fheiceáil :
atá ullamh agat faoi chomhair na bpobal uile.
- 3 Solas chun na náisiúin a shoilsiú :
agus glóir dod' phobal Iosrael.

**Glóir don Athair, agus don Mhac, agus don Spiorad Naomh,
mar a bhí ar dtús, mar atá anois, agus mar a bheas go
brách, trí shaol na saol. Amen.**

Deirtear **CRÉ NA N-ASPAL:**

**Creidim i nDia, an tAthair uilechumhachtach, cruthaitheoir
neimhe agus talaimh; Agus in Íosa Críost, a Aonmhac, ár
dTiarna; a gabhadh ón Spiorad Naomh, a rugadh ón
Mhaighdean Mhuire, a d'fhulaing páis faoi Phontius Píoláit,
a céasadh, a fuair bás, agus a adhlacadh. Chuaigh sé síos go
hifreann. An tríú lá d'éirigh sé arís óna mairbh. Chuaigh sé
suas ar neamh, agus tá sé ina shuí ar dheis Dé, an tAthair
uilechumhachtach. As sin tiocfaidh sé arís chun breithiúnas
a thabhairt ar bheo agus ar mhairbh. Creidim sa Spiorad
Naomh, sa Naomheaglais chaitliceach, cumann na naomh,
maithiúnas na bpeacaí, aiséirí na colainne, agus an bheatha
shíoraí. Amen.**

Go raibh an Tiarna libh.
Agus le do spioradsa.

Guímis.

Téann a bhfuil i láthair ar a nglúin, agus deirtear

KYRIE ELEISON agus AN PAIDIR:

A Thiarna, déan trócaire orainn.

A Chríost, déan trócaire orainn.

A Thiarna, déan trócaire orainn.

Ár nAthair, atá ar neamh, go naofar d’ainm. Go dtaga do ríocht, go ndéantar do thoil ar talamh, mar a dhéantar ar neamh. Ár n-arán laethúil tabhair dúinn inniu. Agus matih dúinn ár bhfiacha, mar a mhaithimidne dár bhféichiúna féin. Agus ná lig sinn i gcathú, ach saor sinn on olc. Amen.

Deirtear na **DUANÓGA & FREAGRAÍ:**

Foilsigh do thrócaire orainn, a Thiarna :

agus deonaigh dúinn do shlánú.

Treoraigh agus cosain ár rialtóirí, a Thiarna :

agus éist linn go trócaireach nuair a ghlaoidimid ort.

Deonaigh d’fhíréantacht do do mhinistrí :

agus cuir áthas ar do phobal tofa féin.

Saor do phobal, a Thiarna :

agus beannaigh d’oidhreachtsa.

Tabhair síocháin lenár linn, a Thiarna :

de bhrí nach bhfuil aon duine eile ann a dhéanas troid ar ár son, ach tusa amháin, a Dhia.

A Dhia, glan ár gcroí ionainn :

agus ná bain do Spiorad Naomh dín.

ORTHA AN 15Ú DOMNACH I NDIAIDH NA TRÍONÓIDE

AN DARA hORTHA (Ar son shíochána)

A Dhia, óna dtagann gach mian naofa, gach deachomhairle agus gach obair chóir; Tabhair do do sheirbhísigh an tsíocháin sin nach féidir leis an saol a thabhairt; ionas go mbí ar gcroí daingean i ngéilleadh dod' aitheanta, agus fós, nuair a bhíonn eagla ár naimhde tógtha dinn, go gcaithimid ár ré go socair, suaimhneach trí do choimirce; trí luaíocht Íosa Críost ár Slánaitheoir. **Amen.**

AN TRÍÚ hORTHA (Ar son ghrásta)

Achainímid ort, a Thiarna, ár ndorchadas a shoilsiú dúinn, agus sinn a chosaint le do mhóρθrócaire ar gach guais agus gá san oíche anocht; trí ghrá d'Aonmhic, ár Slánaitheoir, Íosa Críost. **Amen.**

Ofráiltear PAIDREACHA ag críochnú le PAIDIR LE NAOMH CHRUSOSTOMOS:

A Dhia na gcumhacht, a thug de ghrásta ár n-achainíocha coitianta duit d'aontoil i láthair na huaire seo; agus a gheallas, nuair a bhíonn beirt nó triúr bailithe le chéile i d'Ainmse, go dtabharfair dóibh a n-iarratais; Comhlíon anois, a Thiarna, mianta agus guíonna do sheirbhíseach, de réir mar is fearr dóibh féin; agus deonaigh eolas ar d'fhírinne a thabhairt dúinn ar an saol seo mar aon le beatha shíoraí ar an saol atá le teacht. **Amen.**

Dúntar an tseirbhís leis **AN GRÁSTA:**

Go raibh grásta ár dTiarna Íosa Críost, agus grá Dé, agus cumann an Spioraid Naoimh linn go léir. Amen.